

29 DEC 2003

Dewan-Usul

DEWAN SOKONG USUL TERIMA KASIH KEPADA DR M

KUANTAN, 29 Dis (Bernama) --Anggota Dewan Undangan Negeri Pahang sebulat suara menyokong usul tahniah atas pelantikan Datuk Seri Abdullah Ahmad Badawi sebagai Perdana Menteri Kelima dan terima kasih kepada jasa bakti yang disumbangkan oleh bekas Perdana Menteri Tun Dr Mahathir Mohamad.

Usul yang dibawa Menteri Besar Datuk Seri Adnan Yaakob dan disokong Timbalan Menteri Besar Datuk Tan Aminuddin Ishak dan dibahaskan wakil rakyat Barisan Nasional (BN) Datuk Fauzi Abdul Rahman (BN-Beserah) dan wakil pembangkang Idris Omar (PAS-Semantan).

Adnan ketika menggulung usul itu bagaimanapun menempelak anggota pembangkang yang disifatkan "berpura-pura" dan "nampak sahaja baik" menyokong usul itu tetapi "jahil" serta tidak ikhlas.

Idris ketika membahaskan usul itu berkata pujian yang diberikan kepada bekas Perdana Menteri dilihat terlalu berlebihan, sedangkan ada kegagalan Dr Mahathir ketika era pemerintahannya.

Mengenai perpaduan kaum, Menteri Besar itu berkata Umno dan parti-parti komponen lain dalam BN jelas menggambarkan pemuafakatan pelbagai kaum di negara ini.

Sementara itu Fauzi ketika membahaskan usul itu berkata Dr Mahathir telah berjaya menghapuskan empat perkara semasa menjawat jawatan tertinggi negara itu dan jasanya kepada negara nyata tidak dapat diungkapkan dengan kata-kata.

"Empat perkara atau 4K, Dr Mahathir berjaya menghapuskan kejahilan dengan pembangunan pendidikan negara, menangani masalah kemiskinan dengan memacu ekonomi negara ke tahap yang membanggakan, berjaya meningkatkan taraf kesihatan dan berjaya menangani kebatilan masyarakat di negara ini," katanya.

Yang Dipertua Dewan Datuk Wan Mohamad Razali Wan Mahussin kemudiannya menanggungkan mesyuarat dewan sambil menyifatkan mesyuarat itu mungkin kali terakhir sebelum pilihan raya umum akan datang.

-- BERNAMA

MS BK